



Orang ramai dinasihat lebih cakna fenomena El Nino, musim hujan dijangka serentak

Oktober 5, 2023 @ 5:14pm

KUALA LUMPUR: Jabatan Meteorologi Malaysia (MetMalaysia) mengingatkan orang ramai supaya sentiasa cakna fenomena El Nino dan Monsun Timur Laut, yang dijangka berlaku serentak November ini.

Ketua Penolong Pengarah Pusat Iklim Nasional MetMalaysia, Amirul Nizam Marodzi, berkata kemuncak El Nino juga dijangka berlaku ketika permulaan musim hujan yang dijangka hujung tahun ini atau awal tahun hadapan.

"El Nino dijangka mencapai puncaknya pada hujung tahun atau pun awal tahun hadapan, di mana pada waktu tersebut negara berada dalam Monsun Timur Laut bermula November hingga Mac, yang membawa lebih banyak hujan lebat di negeri pantai timur, Sabah dan Sarawak," katanya ketika hadir dalam rancangan Eksklusif terbitan Nasional FM hari ini.

Justeru itu, Amirul Nizam juga mengingatkan orang ramai, untuk lebih peka dengan semua maklumat berkaitan cuaca daripada agensi-agensi berkaitan, terutama MetMalaysia.

Beliau berkata kepekaan orang ramai terhadap keadaan cuaca dan informasi daripada agensi berkaitan amat penting, bagi membolehkan mereka merancang aktiviti harian serta bagi mengelak daripada kejadian tidak diingini.

Sementara itu, beliau turut mengajak orang ramai untuk menyertai Forum Iklim Kebangsaan Monsun Timur Laut dan El Nino 2023/2024 pada 10 Oktober ini secara dalam talian, yang memfokuskan kepada penyebaran maklumat mengenai jangkaan musim tengkujuh.

Amirul Nizam berkata webinar itu, bagi memberi persediaan kepada semua pihak menghadapi fenomena Monsun Timur Laut.

Webinar ini adalah acara tahunan anjuran MetMalaysia, yang akan menampilkan ahli panel daripada Agensi Pengurusan Bencana Negara (NADMA) dan Jabatan Pengairan dan Saliran (JPS), yang akan diadakan secara langsung di Facebook Live MetMalaysia, Facebook Live Kementerian Sumber Asli, Alam Sekitar dan Perubahan Iklim dan Facebook Live Astro Awani, pada 10 Oktober bermula jam 10 pagi. – BERNAMA